

賜

綺

堂

集

賜綺堂集卷四詩目

車遙遙

觀顧容堂太史王霖作畫

送蔣孝純明府之江右二首

鳳穴四十八韻有序

玉蘭詞六首

點蒼山石歌爲查斗一樞賦

將歸吳中赴長撫軍之招飲臯雲比部孟晉齋  
中留別容堂吉士季超上舍筠樵明經

胡雪蕉水部煥以詩見贈賦此酬之卽送其假

旋星江

王葑亭給諫

友亮

飲餞齋中次贈行原韻畱別

德州道中有歌者王澄自言爲邯鄲名倡遷徙至此

公讌二首

牧庵中丞以呂新吾先生呻吟語一卷屬爲補註因綴以詩二首

望歲圖爲牧庵中丞作

偕鄭明府郭外觀荷花

織婦詞

贈歌者金鈴

題畫五首

米元章雲山無盡

倪雲林疎林平遠

董北苑溪山小隱

王叔明萬壑松濤

吳仲圭南浦孤帆

寒夜懷人二十首

趙約亭廣文

鄭芥園茂才

王鐵夫教習聽夫巡檢

蔣爰亭學士

徐朗齋孝廉

秦小峴郎中

言臯雲比部雨香廣文岢樵孝廉

王筠圃貳尹

李石農比部

長白嵩懋堂雨韭兩孝廉

陳筠樵明經

施渠泉太史陳笠帆吉士

龐鹿園太史韓雲舫吉士

顧容堂吉士

沈蓺漁廣文

懷亦亭侍衛

何雲蘊叅軍

沈芝田進士

俞澧蘭判官

漢喬十弟屢因秋闈

池魚

籠鳥

盆蘭

瓶菊

秋暑吟

哭沈芝田進士四首

題繡茵小影爲裴訥庵作四首

有序

出門示弟受初

啓甲坤餘

振甲二首

和黃蕘圃同年

丕烈

移家原韻四首

江口

寄主鐵夫同年卽用都門贈行原韻

新婦巖三十韻

將軍巖三十韻

錦石歌

有序

西湖花神廟二首

西湖懷古六首



賜綺堂集卷四

吳苑 詹應甲 鱗飛

詩

車遙遙

車遙遙心搖搖客程日暮風蕭條雙輪磨鐵鐵骨銷肥  
馬不行瘦馬跳停車牽馬出轅下有馬欣然來就跨一  
息百里乃頓舍馬已解鞍車未駕

觀顧容堂

王霖

太史作畫

我聞作畫有天真不在經營在神理婁東人老荆關休  
墨妙今歸顧太史胷吞河嶽游蓬瀛五日一山十日水

含豪落紙鴻濛開手攬奇峰落窻兒羅浮風雨自合離  
縱之尋丈約尺咫槎枒老樹根鬱蟠莓苔剝落石齒齒  
陡然瀑布空中飛倒挂虬龍飲澗底古桀一張筇一枝  
人在濛濛水雲裏山樓半角隱羣微中有書聲幾時起  
坐間繁暑頃刻消只覺寒濤沁肌髓吾家草堂亦如此  
一竿添得琴高鯉不畫滄洲畫釣洲來年買棹先歸矣

送蕭孝純明府之江右二首

草草長安過一春南歸腸似轉車輪三年刻楮仍爲客  
百里栽花又送人正學商量禪學定儒官舊業宰官新  
他時來訪西江上認取匡廬面目真

章門迢遞悵離居九陌黃塵問訊疎到處願揚風出袖

送行詩錄於便面

瀕行恰值雨隨車客須求仲方開徑地近衡

陽好寄書定有無雙循績著雲霄南望鴈行舒

謂齊園先生

### 鳳穴二十八韻有序

春風一剪寒生燕子之巢縞月三分瘦到梅  
花之骨相逢越女問姓山中始識韓僮呼名  
簾下那禁夜雨頻啼瞿峽三三便託朝雲未  
繞巫峯六六真珠百八紅豆一雙遂令蜨翅  
留香還倩虎頭寫影標題鳳穴祖玉溪生洞  
戶之篇結契魚梁勝金筌客橫塘之夢

鳳穴無雙種琴溪第一弦呼名友掾合顧影冀妻憐星  
鑿清揚婉珠喉滴瀝員十三工擲籀百萬兢堯錢破老  
非關街追憐亮有緣心香薰繡被眉語轉歌筵菡萏花  
如面櫻桃樹並肩卧時風聚雪立處月生煙只合居金  
屋從教徙碧田屈身栖北里回首悵南天紅淚沾衣濕  
黃塵壓髻偏有誰欺撲朔自分老嬋娟豈意薇垣客原  
知桂殿仙神臬經鳥集深巷擁花眠慧黠能監酒溫柔  
許擘箋禿襟扶帳後細馬騁車前盡說齊倡艷休誇鄭  
姝妍奈何雲不雨長此夜如年有客蛩居蛩無心蛭附  
蟬爲從大夫宴偶泊孝廉船一顧神俱授三商意始宣

附贈行詩

言朝標舉

南遊勝踏六街塵暫作蓮花幕裡身跡似斷鴻歸亦  
客骨爲駿馬買何人輩流推許才無匹湖海知交分  
最親風雪征途君獨去坐中枉喜得陳遵  
燭燼寒窗月影過開尊拚得醉顏酡渡江剛赴尋梅  
約吹簫愁聽折柳歌纔合作離難自遣似君知我况  
無多贈言記取重來日看詠霓裳到大羅

陳聲和筠樵

一月征程伴落暉梅花開日省庭幃得逢知己終爲  
用尙在依人不當歸玉樹歌成香入夢旗亭酒煖雪

初飛此行莫賭黃河句識曲雙鬟見亦希  
臨岐執手慰離魂貧賤身須氣骨存幕府自應羅國  
士才人尤怕受私恩一宵旅館留同榻非日良朋勸  
別尊爲語中丞真愛客未妨長揖到軍門

胡雪蕉煥水部以詩見贈賦此酬之卽送其假

### 旋星江二首

正學河汾後如卿氣獨豪酒懷吞海嶽詩筆掣鯨鰲秘  
笈抽金匱清才重水曹感君投贈句鱗角喻牛毛

萬仞高湖下

余舊居星江高湖山下

吾家有傲廬門臨虹澗曲地

近鹿山居白髮承

恩健黃塵問訊疏來年春醞熟遲

我話樵漁

飲王封亭 友亮 給諫齋中卽次贈行原韻

黃沙捲地朔風天人似驚鴻去影翩  
士氣豈緣遊幕屈  
公才非待諫垣傳此行鄉里仍彈鋏  
他日騷壇再執鞭  
待得繡衣江上過雙扶玉節導花前

附原作

好在青門雪霽天看君裘馬去翩翩  
一卮別酒風中把  
萬首新詩日下傳蓮幕文章須巨筆  
杏園煙雨待絲鞭  
吳閶是我曾遊地爲問春光可似前

德州道中有歌者玉澄自言爲邯鄲名倡遷徙

至此

琵琶斜抱出風塵誰識邯鄲夢裏身卿自願爲厮養煩  
尊前莫更說才人

公讌二首

旗門吹角月纖纖平政堂高不捲簾花下簪裾僚吏集  
閣中琴酒主賓兼肴烝當爲燔羊徹觴令無須射鵲嚴  
難得海疆清讌久飲和今已徧荊櫓

兕觥滿泛鬱金香曹掾爭看客據牀嚴武禮容寬杜市  
義山章檄出彭陽麗官偷寫歌三疊牙將歸攜燭兩行  
試聽閣鈴窗外語那能清夢到滄浪



牧庵中丞以呂新吾先生呻吟語一卷屬爲補註因綴以詩二首

傳誦寧陵學呻吟一卷遺苦心兼苦口良吏卽良醫呼  
吸通民氣纏綿固國維此中參妙理何必問軒岐

持節臨吳會南天閩澤覃去奢身示儉矯獎首懲貪當

事痼癢切吾儒咕嗶慚遙知私淑者不獨有潛菴潛菴中丞

之學與寧陵相表裡嘗自謂謹  
虎之政奉新吾先生爲師云

望歲圖頌爲牧菴中丞作

猗歟我公爲國之楨以教以養以佐一人昔公在吳  
民物如春移節東郊戚我吏民吳民有喜公復莅止公

任益重公勤靡已公之報國公忠正直公之字民春秋  
稼穡字民力田報國逢年力田惟民逢年惟天惟天佑  
民惟公惠人惠人若何尚德任仁德仁協應公悉天鈞  
公教所通時有和風公敬所臨時爲甘霖和甘所被浹  
民肌髓積順爲祥歲有伊始迺瞻青齊黍稷華滋迺瞻  
三異禾麥載塗歲有四秋以迓天庥屢豐肅告公無殷  
憂公輶載經人望歲星其國則熟不待守心願登明堂  
調燮陰陽推恩四海四海穰穰光我 皇治錫福無疆

偕鄭明府郭外觀荷花

野老不識花中趣年年種蓮等菱苒蓮花結子採入城

荷葉賣與包鹽去那知縣官看花來片逢載客花邊住  
折得新荷當酒盃拈將落瓣題詩句野老奉壺前致詞  
一尊清釀爲公具鄉村不警夜月多公愛看花任延佇  
明年花信若還來願與添栽花幾處

織婦詞

十日織一素五日織一紉妾身尙締給能耐宵燈寒寸  
絲與寸縷誰解妾心苦持此問夫君翻嫌花樣古新花  
巧入時經緯如何施停機坐長嘆寧使觀者嗤

贈歌者金鈴

愛聽風前語金鈴記小名護花春信逗繫犬旅魂驚細

向釵梁綰香同扇墜輕斷腸應未解漫作雨淋聲

題畫五首

雲來山欲迎山走雲不讓墨氣有時收雲光無處放米  
元章雲山無盡

秋山清若空秋林淡如此古徑寂無人斜光照亭子倪  
雲林疎林平遠

山色不自幽風泉共成趣蘿屋兩三間書聲出高樹董  
北苑溪山小隱

寒濤幾萬重併入筆端落不見樹參天但聞風滿壑王  
叔明萬壑松濤

空江澹無際浦樹帶暝色煙帆一片飛何處天涯客  
仲圭南浦孤帆

寒夜懷人二十首

煙雨吳淞舊釣徒筆牀茶竈老江湖鱖魚橋下桃花水  
流到青溪九曲無

趙約亭廣文

青衫血淚裏琵琶千古風流屬鄭家除却堂前書帶草  
爲儂盡種合懽花

鄭芥園茂才

談文輦下騰金馬磨楯軍中獵白狼筆力千鈞弓五石  
果然天壤兩王郎

王鐵夫教習聽夫巡檢

微垣退直午香添謝客齋房不捲簾一縷文心參鼻觀

玉梅花下讀楞嚴

蔣爰亭學士

同向金門待詔來

賜衣天上五雲裁如何拋却珊瑚

筆不賦長楊賦玉臺

徐朗齋孝廉

胸有千秋筆有神文章風采本天真平生知己甘師事

淮海先生第一人

秦小峴郎中

風流吾愛言夫子文學還兼政事科閉戶不分南北阮  
自翻治譜譜絃歌

言皋雲比部雨香廣文苛樵孝廉

太原公子謫仙曹下筆天風捲海濤可惜藍田詩滿壁

雙松不種種櫻桃

王耘圃貳尹

絕大神通筆一枝能將芥子納須彌西曹名作如林立

低首嵯峒集裡詩李石農比部

大戴經年注古經風前小戴玉亭亭何當並奏鈞天樂

議禮從容上 帝廷 長白嵩懋堂兩進兩孝廉

湖海元龍氣未除十年面壁竟何如維摩古寺雲封斷

祇許青山伴讀書 陳筠樵明經

鏡裡芙蓉捧捷回探春先後上蓬萊一時著作承明者

歛手金臺兩秀才 施琴泉太史陳笠帆吉士

鹿門枯坐證菩提闢佛昌黎不肯詆最憶題襟年少日

雙峰角立太行西 龐鹿園太史韓雲舫吉士

玉篇家學傳江左彩筆才名出禁中題到淵如新帖子

未將畫法表婁東

顧容堂吉士

年來塵夢醒揚州  
載酒江湖悔舊游  
莫把風懷惱杜牧  
更從禪榻上青樓

沈蕢漁廣文

含香列戟執金吾  
派衍銀潢玉一株  
宮漏漸沉天欲曙  
露華如水濕雕弧

懷亦亭侍衛

何戡潦倒髭絲生  
馬首西來一笑迎  
記向鮑家村外過  
酒香晴雪樂陽城

何雲麓泰軍

輕帆一剪卸春雲  
湧上人歸握手殷  
想到夜深吟燭短  
選樓高處痛休文

沈芝田進士

判官且自判功名  
華髮盈顛宦未成  
十丈軟紅塵撲面



莫將禍刺謁公卿  
俞澄蘭判官

四海何人一子由  
對牀擁被不勝愁  
阿兄兩鬢星如許  
盼到西風幾度秋  
漢喬十弟屢困秋闈

### 池魚

濠梁忽不樂  
潛泳陂池中  
可憐一勺水  
蓮葉迷西東  
不知澤易竭  
幸免波濤洪  
託身苟失所  
鵠化難施功  
江湖萬里心  
到此浮雲空  
井墓與竅蚓  
相與議其終

### 籠鳥

鷹隼不受羈  
鶴軒還待駕  
嗟爾入樊籠  
也許一枝借  
卑栖不自擇  
高飛本無藉  
能言招怨尤  
聞者或猜罵  
偶然

啄香稻呼與雞鳬亞回視同林鳥遨翔不肯下

盆蘭

幽蘭秀空山素心澹無欲朱門深幾重誰剪一痕綠分  
移玉盎中先經箸籠束蚓結與蟻穿同根甘屈曲勉爲  
霜露滋弗受膏澤沃庶幾闕清芬室中能達俗

鹿菊

老圃秋色佳不合籬下寄剪除配清供高下任位置軍  
持水涓滴灌溉良不易晚節要能完託根已非地野花  
開口笑爾守挈瓶智慎勿傲風霜無言自憔悴

秋暑吟

秋花零落秋葉黃  
菱荷槁死五尺長  
當門衰柳影幾行  
亂蟬振翼嘶夕陽  
高原絕巘起煙焰  
日脚無雲迸飛電  
陂池水落成湯泉  
魑婦驅蝗開鄉縣  
八竈洞開木楊支  
坐久那得風如絲  
科頭赤足尙揮扇  
桔枲嗚咽如啼饑  
象牀珠箔豪家屋  
瑤姬汗香薰水玉  
紅濕輕容唱新曲

哭沈芝田進士四首

一第還山早功名事已差  
但能杼素抱何必歷清華  
留得千秋筆終開五色花  
性靄應不死散作赤城霞  
鼓篋膠庠日清才獨數君  
文章追雅頌意氣薄風雲  
共席何嘗割題襟幾度分  
楚回梁月落疑是暫離羣

我返雲中旆君回雪下船解裝方暮夜話別已中年骨  
爲吟詩瘦心緣守道堅玉堂愁不到偏到玉樓邊  
問訊春風裡扶牀語倍真已完名士局不現宰官身兒  
釋教從學親衰恐愴神他生知獲福更莫幻才人

題繡茵小影爲裴訥庵作四首

有序

繡茵善歌訥庵將納爲姬先以此畫乞題故  
嘲之

丁字簾前小玉家繡床一角頓琵琶年來求仲風狂甚  
醉竹無心只醉花

瑤華開向十三樓試與幽蘭結並頭坐傍文茵心便醉

更無塵夢到揚州

露珠心性絮因緣  
慧業難消二十年  
聞說妝樓人散後  
杏花紅雨病嬋娟

博得愁心付柳條  
隔窓吹透雨蕭蕭  
龍山虎阜無多路  
也送歸帆唱灞橋

出門示弟受初 啟甲坤餘振甲二首

不盡臨岐語  
宵來與細論  
抽身吾意決  
揮手汝聲吞  
空愧家門長  
難酬骨肉恩  
公車仍屢下  
何以慰晨昏  
溪口雲千疊  
江頭月一灣  
松楸依故里  
燈火夢寒山  
奔走平生累  
交游薄俗艱  
衡陽書易遠  
莫待鴈飛還

和黃薏圃同年丕烈移家原韻四首

公車同下賦閒居擬傍宮牆訪舊廬洗馬前朝留巷古

掌鳩大宅似舟虛

新居王龍馬宅舊官

幽尋北郭移家具笑指

南山奉板輿除却奚童石背上腹中別貯五車書

樂聞東原里本醇買山可許結芳鄰藜祠賽社呵丁甲

蘭譜題襟始戊申小園圖書含古味荒園竹石見天真

偶然吟思隨花發漫把詩人比學人

茗椀詩籤位置幽等閒未許俗塵留琴張桐韻調丹鳳

檐接藤陰挂紫蚪近市可通閭闔氣論交先別渭涇流

閒鷗野鷺時相訪那用山中聘鹿山

浮家我欲夢煙波可奈舟如不繫何  
四畝荒莊餘舊趾  
萬間廣廈廢高歌倦遊湖海帆初卸  
強起軍書猶未磨  
時將有  
安得草堂貲滿橐閉關終歲却塵魔  
遠行

### 江口

西風吹野艇十里蕩斜陽水夾寒沙  
白山兼落木蒼蒼  
樵臨渡歇架網待潮張  
莫道逢迎少鷗羣與雁行

### 寄王鐵夫同年卽用都門贈行原韻

翔鸞偏戀浮鷗羣歸心尚滯南飛雲  
何堪割宅勸君佳  
難得主客皆詩人眼前一霎升沉變  
我亦司空同見慣  
讀書非必爲科名翻怪臨岐殊戀戀  
侯門彈鋏誤華年

裴徹何曾肯乞憐樊川新却奇章幕

時余方却中筮澤  
丞奇公之聘

重呼魯望船荒江從此音塵阻點點愁心茆屋雨料無  
好夢到春明寄語王郎莫凝佇

附  
原作

王芭孫 鐵夫

士方窶賤易爲羣飛去輒成泥憶雲生平海內幾相  
識胷腹往來多故人詹君十年心不變三別長安又  
三見君亦栖栖羈旅間解衣殊有綈袍戀登科昔日  
快同年此時同罷還相憐一朝揮手忽言去歸掃邛  
藁登江船此行努力慎無阻君去吾隔隔風雨明年  
設榻待君來莫令花前久延佇



新婦巖三十韻

桃源佳麗地之子影偏孤對水開奩鏡凭山展畫圖  
喬松青帳幔芳草綠毵毵莫問歡和悶遙憐美且都  
催粧梅點額勸醉鳥提壺曉月牙梳掠晴霞繡帕紆  
瘦腰虹作帶艷質雪爲膚烟黛浮眉遠荆釵插髻  
亂知吟絡緯葉解滴珍珠鶯燕拋梭剪葦苔刺袷  
襦已看衣薜荔漫道采蘿薜壻台名阿丈公應喚太  
愚駕橋難得鵲織錦慣聞鳥啓母全然別湘君任  
所呼飛昇猶撫几却立豈當壚七夕頻虛度三星  
自向隅何曾窺宋玉原會非秋胡隔渚牽黃犢  
遊人秣白駒盈盈誰許爾渺渺亦愁

吾端坐空千古飄零謝五湖堅貞心不轉言笑意常無  
閨熙同斷關娉婷儷望夫化妃嗤野魅負石媿仙姝江  
詎遺瓊佩臺須守竹符行雲長寂寞多露獨躊躇節以  
風霜勁顏非脂粉汗姊其峯玉女婢則谷盧奴鳳曲休  
挑卓鴻書待報蘇洛神奚足妬天姥與相娛未信彭郎  
港無媒嫁小姑

將軍巖三十韻

鐵立氣昂藏登壇矚莽蒼八公會助晉三略本師黃赴  
迥腰圍潤飄飄鬚髮張營堪名細柳氏或姓空桑寶劍  
空同外雕弓皓魄旁苔粧金鎖甲筭簇綠沉槍列岫旗

多展鳴泉鼓獨當如茶崖積雪若日葉經霜笳吹秋聲  
勁鞭叩電影長熊罷揮別隊虎豹隸中央潭會排魚麗  
雲能送烏翔韜鈴從少室輜重指陳倉騎向昭陵借圖  
于蜀陣詳環身騰野馬仰而射天狼嘖嘖韓彭壯睢盱  
褒鄂揚雁書傳露布烏幕用沙量偉幹誇翁仲神戈敵  
魯陽披帷疑誚項臨洞待擒方關祇泥九塞邊惟壁壘  
防燒屯然夜火投石輟雷礮撼岳人誰敢呼嵩我自將  
洗兵看細雨斥埃置巍岡大樹擎高蓋明霞畫太常蛙  
喧歌兩部螢散燭千行花樣矜新寵癥痕認舊創坑深  
嘶渴驥石怪供官羊茅土春尤富蟬冠夏亦涼磨碑銘

朔漠作柱鎮炎荒不朽山如礪平分笏幾床青霄爲挂  
印北斗燦輝光

錦石歌 有序

陳筠樵贈小石四十枚蓋自荆湖夔得於峽中  
者因杜詩有錦石小如錢之句爲作是歌

美矣哉案頭一握碎琅玕何以盛之白玉盤斑斕五色  
遮隱見雲霞組織無倪端駁文雪浪未足喻以手玩弄  
坐長歎陳君嗒然笑教予注目看來此八千里行經十  
二灘蜀道雖云難江行洵奇觀怪石萬狀自古嘲青天  
一線縈岩巒上有瞿唐灘頽如象如馬之崔巍下有鹿

角狼尾懸空倒瀉之飛瀟黃牛旌旗杜宇鑿啞厓水石  
怒相搏傾崖坼岸日激盪萬古展轉那得安楚江故自  
蜀都下濯成錦色隨潞潏天孫支機此其亞晶瑩膩滑  
儼雕刻昔歲扁舟溯荆益篙師百丈牽絕壁楚臺日墓  
猿愁人屈廟秋深鳥送客懷古高登白帝城悲歌醉入  
羅合宅霸圖文藻兩浮雲嵯峨滿望皆陳跡但逢好處  
便收帆下船自著尋山屐錦石紛紛洲渚多腳踏崑崙  
眩圭壁龍澄所棄我取之餅餌何須小兒易金藏秘本  
縱未窺袖中已飽元章癖當時選石如揀金今日堆盤  
尙能識赤甲白鹽次第分歸州大沱青紫文虎牙紅質

間素縷明月娟娟靄薄雲其一參差點星斗臥龍入陣  
排奇耦其一虹霓繞蔚藍巫山神女雨初酣其一淙濛  
鬱蒼翠琵琶峽裏思眉黛其餘黃者來玻璃青者雜出  
巴東西眼底璘璊各可辨耳畔猶聞子規啼我聞斯語  
發大笑杜公麗句真詩料書齋作供清且奇不數星池  
及員嶠君話遠遊我臥遊亦從夷陵趨夔州縮置几席  
一拳耳硯池擬作三峽長江流座中一客勸我且椎硯  
其中定有印篆大書忠孝侯

西湖花神廟二首

秩與勾芒一樣尊新祠堤上薦芳蓀國開錦浪三千頃

功奏香風廿四番處處瓊林都入鑑年年藥榜早掄元  
孤山高士神還在應喚霜禽守廟門

金鈴殿角響丁冬羯鼓聲連蕭寺鐘榻是辛夷牆薜荔  
袍如楊柳面芙蓉人間湯沐環山錫天上恒哇剪葉封  
木客竹郎俱遜爾登階先撫大夫松

西湖懷古六首

三亭崢立六橋橫白傅蘇公舊並名楊柳絮迎驄馬過  
芙蓉香送畫燒行天開筆墨山川韻水沸笙歌日夜聲  
太息斯人吾不見探春慵自聽啼鶯

靈芝遺跡草蕭蕭霸業當年兀自驕衣錦將軍環石鏡

彎弓水手射江潮虎符龍節傳三世玉冊黃圖獻一朝  
千古寶融能有幾表忠燈火故難祧

泥馬南來此定都君臣傾國爲西湖三春開宴隨花賞  
八月觀潮上畫圖和議祇應論割地偷安深自厭援枹  
淒涼五國城中客雪窖年年望眼枯

鰲山燈火夜如年京兆行春給賞錢玉珊簇排萬歲字  
金爐燒結五雲烟宮中舞隊喧天樂湖上歌兒艷水仙  
回首宣和遺事在汴都還讓武林妍

湖邊遊幸日相從尊養多應說孝宗宮女垂簾吹紫鳳  
侍臣分隊駕烏龍亭臺半屬宸題墨草木猶傳御愛松



聚景延芳今寂寞南高峯對北高峯

岳于雙墓對湖濱同是中興社稷臣志壯復仇空飲恨  
功成再造亦危身金牌又有襄藩枉鐵像應增徐石新  
梓木向南相待久精忠前後自爲鄰

賜綺堂集卷五詩目

江水三章

江汊

由風潭陸行至峽口

武林節署上長牧庵中丞二首

周大山孝廉戴崧招游湖上

東李春麓觀察四首

贈莫觀雲郡丞景瑞二首

吳山西爽閣和壁間原韻三首

自錢塘放舟攜家之蘭陰講院示荔香七首

荔香銀燭秋光圖爲管蘭因女史所繪題四首

題柳陰飛燕圖

寒宵寄亦廉六叔

維翰

瑋堂二叔

嘉瑞

二首

關山

吹臺秋望四首

曹家渡

保安驛丞張煥死事詩

無題六首

嘉平旣望同沈姬慧生眺雪山南畝憇白雲禪

院三首

與沈姬泛舟湖上歷北山禮佛而歸四首

秦小峴觀察始建蘇公祠於孤山之麓招飲望  
湖樓中二首

將之星江荅小峴觀察贈行原韻四首

慧生手植桂乞詩二首

山居二首

亦廉六叔招同瑋堂二叔漢喬十弟酌酒半嶺  
僧房之讀書樓中信宿畱題二首

宿天柱庵

小除前一日同亦廉六叔瑋堂二叔漢喬十弟

貝集卷之三  
載酒吳山之麓聯句

立春前一日登北山聯句

立春後五日同亦廉六叔瑋堂二叔漢喬十弟  
至宋村青山先塋拜畢攜酒具憇飲竹間聯句  
得長律二首

哭亡友陳筠樵

車盤嶺

湖上畱別李石農觀察

讀小峴山人文集

黃蕘圃同年招同吳玉松太史張子和比部小

飲讀未見書齋分韻得難字

石鐘山

琵琶亭

黃梅縣晤徐聞齋刺史三首

道士袂

三江口泊舟

雨中登大別山

董牧堂孝廉鍊金以白陽山人畫乞題四首

上元詞

妾薄命

草堂書意十首

雪後餘杭道中宵行

登江天閣望焦山

梅花嶺

賜綺堂集卷五

吳苑 詹應甲 鱗飛

詩

江水三章

江水溶溶江霧薄江船放纜江干縛千里雄灘怒相搏  
江鷗與客同飄泊

江水灝灝江風鳴江船折舵江中橫萬丈洪濤力不爭  
江豚拜客如送迎

江水茫茫江月墮江船卸帆江上臥一葉孤篷推得破  
江猿招客來唱和



江汊

春山一角江上樓春帆一葉江上舟微風不興水波小  
虹梁界斷長江流柳外鳴橈汰游鯉鏡中放酒浮鷗  
瓷杯酒泛鵬頭綠乍停乍飲無拘束興酣試學款乃歌  
兩岸漁船笑聲續斜陽照波紅漸微殘霞鴉背如鸛飛  
還把餘杯吸明月直待晚潮相送歸

由風潭陸行至峽口

層湍險絕磳道南石路凹凸林盤鬱下有百丈蛟龍龕  
奔流奮激無泳涵風濤拗怒巨石慙衝突戰鬥時沉酣  
其上絕壁雲相參蒼松大榕夾榭楠疎雨乍過天蔚藍

朝光半嶺如秋嵐竹輿小頓溪上庵破衲長老能鄉談  
指點此路君何堪我生落拓好奇探如此嶮巖非所耽  
長嘆凝立心自慙

武林節署上長牧庵中丞二首

朝衣一品五雲裁銜

命東南節府開

公以一品服撫浙蓋曠典也

千里耕桑滋雨露三山鯨鱷避風雷能將赤手回元氣  
直矢丹心貫上台回意吳都綏撫處樓中野鶴早飛來  
來鶴樓在金閶節署公撫吳時余曾下榻其中

帝倚親臣作棟梁江山甌越控巖疆風清鈴戟神君鏡  
澤遍關門估客航老范甲兵原學術宣公經濟見封章

如何嚴武軍容整尙許麻鞋客據牀

周大山孝廉

載崧

招遊湖上

六街春深同報罷挂帆先我江南下我聞錢唐山水奇  
翩然一葉沙棠駕官齋扃閉如僧寮故人知我來過夏  
隔宵折柬湖上游海潮飛雨檐前瀉坐聞急湏鳴濺濺  
恐誤登山雙不借來朝雨止生涼颼籃輿一肩提上架  
主人未到客喚船先有雛鬟走相迓湖山入夏喜濃妝  
粉黛淫淫和蘭麝自然媽媚失其真誰識美人還待嫁  
一番疎雨洗秋光能令鉛華向空謝譬如新浴晚涼天  
小扇輕羅倍嬌姪相如好色兼好遊周郎知我言非詐

手攜紅袖去看山玉簪倒挂花枝亞女伶玉簪雙扶人歌以侑酒雙扶人在淥蘿陰不管流鶯盡席罵歸來玉簪坐兩頭波心一山蓮衣御藏鈎約髻正溫存忽憶春明懽卜夜酒醺畫壁幾人同如君才地無雙價我亦江湖載酒來勝遊難遣須乘暇回船指點湖上山一時都與煙雲化

東李春麓觀察四首

萬間廣廈戀空桑御李平生願如償提點幾人參玉局監司自昔領牙璋江山控引嚴兵衛財賦東南重海防相業由來仙骨具豈徒銀戟總臺綱

青瑣名高絳節尊令行秋肅氣春溫政多棘手才能展

官矢冰心俗共敦再晉升階仍豸服羣欽師表是龍門

海波不起鯨魚避消盡潮頭萬馬奔

花驄遍歷鳳城隈赤棒宜風到外臺

巡視東城由臺諫出爲杭嘉湖

道千里湖山歸鎖鑰九天鸞鶴下蓬萊遍敷膏雨蘇隄

築同奉清塵蔣逕開

識君於蔣霽園先生邸第

愛聽關門與頌洽帆

檣都爲使君來

兼理關政

蕃宣懋績首清釐雙綰銅符報最時

初權方伯

難得操持僚

友共早邀特達

聖人知牙幘畫角江頭棹驛樹秋蟬嶺上詩相送滄溟

挂帆去島夷咸仰鳳麟姿

時送映喆明貢歸國以

贈莫觀雲景瑞郡丞二首

京洛神交已十年，翻從湖上話前緣。  
詩成嶺表花如雪，地近天台吏亦仙。  
已靖海氛安井牧，能新士氣嚮歌絃。  
閨風臺外張帆去，直送雙旌到日邊。

軍門長揖謝諸侯，迢遞江關已倦遊。  
還向名山尋舊業，敢從幕府託清流。  
受知國士同青目，爲語延評近白頭。  
明府同受知許借曹倉三萬卷與君嘯咏到瀛洲

吳山西爽閣和壁間韻三首

背枕江天濶，湖光此地收。  
山寒仙近佛，林響屋如舟。  
藤老綠颺颺，窓虛見鷺鷥。  
古牆尋舊句，苔繡墨痕留。

浮邱吾道友終日啓元關試問孫公跡丹成不在山  
墮空花落後琴語鶴飛還無限登臨意幾鐘夕照間  
塵市分棋局煙嵐展畫屏樹頭斜挂塔石骨瘦支亭杯  
滿思吞月樓高許摘星老蓮懸榻後流寓幾人經

自錢唐放舟携家之蘭陰講院示荔香七首

盡携奩具載詩瓢同夢津亭艤畫橈一葉江山大如屋  
推篷穩看海門潮

樹杪燈紅郭外樓赤松亭下夜維舟酒醒不辨滄江雨  
疑住瀟瀟水閣頭

七里灘頭十九泉紅囊手揀累卿煎蓬窓更北風簾靜

日課茶經一兩篇

山風吹雨濕羅衣。潑墨濃雲水面飛。  
夜半檣高新漲健。移船喧傍釣魚磯。

嵐光如沐鏡平鋪。終日梳頭對畫圖。  
偷寫春山上眉黛。舵樓頻問卸帆無。

春晴送暖入船窓。無復驚濤打客艚。  
一而青山三面水。桴歌聲裡到蘭江。

雲山小住卽蓬萊。馬帳還從此地開。  
江上石尤吹不到。講堂高似避風臺。

荔香銀燭秋光圖爲管蘭因女史所繪題四首



儂家生小住蓮東因畫長蛾製筆工料得江郎才已盡  
故貽彤管助春風

漫將頑豔比姚黃生長文園體自芳恰遇漣波亭下秀  
生綃染出荔支香

雲山千里接江天同夢煙波泛宅船儂亦倦游歸去好  
傍城四畝種花田

年來泊游兩浙每江山千里之外亦  
揚家焉

禪榻無端颺髻絲中年哀樂慧心知樊川自笑風情減  
莫謂輕羅小羽詩

題柳陰飛燕圖

春風搖搖上柳枝柳眠未起柳不知空中拋下雙玉剪

翦斷煙痕嫩黃淺寒食梨花陌上春梅梁好夢落輕塵  
羞將太液池中鏡偷照昭陽殿裡身芹泥不啄啄飛絮  
一片春愁寄何處翩然飛去又飛回莫被長條低綰住

寒宵寄亦廉六叔維翰瑋堂二叔嘉瑞二首

廿載橫經地風迴過嶺雲掩書商舊事謝客厭新聞家  
累中年共鄉心入夜分升沉何足計愁絕是離羣  
得失翻棋局豐荒守硯田病除消衆謗才盡畏人憐雁  
影垂虹樹雞談小雪天春來應握手安得買山錢

關山

山樹壓馬頭山石撲人面薄暮登關山鄉關望不見陰

風吹靈旗古廟有鬼戰到此神志凝不覺登頓倦長嘯  
下龍岡一燈隔林壑

吹臺秋望四首

高臺凝眺得秋先不見長河落日圓地近中天通萬籟  
堂開平野列三賢臺下有祠範唐賢李自杜甫高適三人遺像隔牆樹影深  
藏驛繞屋風聲似放船試問崆峒舊題石幾時苔蘚繡  
荒煙

長隄百折抱城隈殿閣還從此地開艮嶽星辰臨少室  
梁園風雅溯繁臺懽騰農畝雲如積梵靜僧寮雨欲來  
千古元圭崇禹德天章銀漢自昭回

頗聞河朔簡車師節鉞壽邊羽檄馳惡少如雲騰白騎  
大軍指日報紅旗花苗格被歸耕牧并服來朝靖島夷  
時聞苗疆大捷海國入朝到處金鐃傳鷲鼓班生懷筆欲何之  
汴都風景比吳都蕭瑟江關入畫圖水落金池朝洗馬  
天高鐵塔夜啼烏東京故事餘塵夢南宋新書補說郭  
漫擬劬枚詞賦手且將踪跡溷屠沽

曹家渡

野氣昏如墨遙山月未升寺荒僧賣酒林密鬼然燈逆  
旅難投轄寒漁不守罾宵分危柝警鄉夢總無憑

保安驛丞張煥死事詩

驛無守具官無兵賊來犯驛驛馬驚驛卒跪請官入城  
官曰吾職乃守此義與驛馬共一死大聲一呼奮袂起  
抽刀屠賊如屠豕賊衆且潰官色喜壯哉何官驛丞耳  
驛丞手無縛雞力能伸大義死不惜若擁牙旗坐上頭  
身先士卒軍心激援兵不至城門開賊怒驛丞合隊來  
火礮入夜轟如雷驛丞死事計早決但恨羣賊未撲滅  
體無完膚罵不絕吁嗟乎閭閻衆口月流血破巢之下  
一卵完 褒忠有典加其官官卑未有如驛吏驛吏千  
秋育生氣保安之難丁巳春婺源張煥殉其事

涼蟾似水浸階除誰捲晶簾讀道書解得四聲從苑出  
選樓定有女相如

隔牆絮語撥冰絃聽徹清歌意惘然想到團圓兒女夜  
小窗燈火話歸船

近來松栢滿西泠還向孤山吊小青到底癡情消不盡  
枉教阿母授金經

願作瑤池並帶蓮三生石上證仙緣麻衣如雪歸來晚  
此事沉吟竟五年

雲山三楚角聲愁懷筆從軍悔壯遊一自陽音驛阻  
雁飛不到絮香樓

杏花消息等閒過我亦流光付逝波  
切莫臨風怨遲暮  
髣髴更比淚痕多

嘉平旣望同  
心姬慧生眺雪山南留憩白雲禪  
院三首

一片空明境招來翠袖間  
樹光凝晚寺燈影出寒山  
瘦不如僧定殘鐘帶鳥還  
中宵聞梵唄心與水雲閒  
借榻齋厨偈開匳鏡水斜窻  
梅緘綠萼圓菜凍黃芽渡  
遠舟難喚村閒酒易賒  
乘朝望松雪何處問田家  
龕火虛堂乞爐香小閣添  
雀窺殘月樹人捲隔花簾  
山響能驚枕冰寒尚挂檐  
湖樓貪遠眺不避朔風嚴

與沈姬泛舟湖上歷北山禮佛而歸四首

難得寒光遍六橋  
曉妝未竟喚輕撓  
與君冷眼看山色  
不盼花朝盼雪朝

紅心小草渺天涯  
油壁香車第幾家  
尋到西泠橋外路  
招魂重與種梅花

攜手三生石上來  
落花如雨捲經臺  
皈依早向蒲團住  
夢裡潮音又一回

湖樓面面倚斜陽  
花影扶人轉畫廊  
要上高臺多結佩  
怕風吹入水雲鄉

附  
和作



曉風吹夢過長橋  
鵲影衝寒上畫橈  
爲愛山南楓葉好  
不同桃李艷春朝

小棹初停曲水涯  
好攜酒壺飯僧家  
有興遍歷山深處  
穩勝香車碾落花

蒲團回首憶西來  
花雨紛紛下講臺  
解道仙緣皆佛力  
潮音吹作紫雲回

樹杪樓臺淡夕陽  
四山落葉打空廊  
茱蘿許補三間屋  
分得湖光住此鄉

秦小峴觀察始建蘇公祠於孤山之麓招飲望

湖樓中二首

寂寂寒岩下湖樓問水濱梅花應笑士葑草尙懷人淮  
海文章古嶠山俎豆新方知經始者香火有前因  
公去蘇公後風流七百年還呼詹孟舉來此酌寒泉二  
客能從否三賢亦渺然杭人合祀李鄴侯自香山林和靖及公爲四賢向未設有專祠  
使君懷古意豈獨在詩篇

將之星江答小峴觀察贈行原韻四首

坡仙宦蹟與君同畱得湖樓一鏡中歸告吾家惠州守  
千秋更有主人翁

山人詩筆鬱岩堯舒卷雲霞在絳霄攜向歲寒岩下讀  
江湖散作雨瀟瀟

石骨巉巉歛瘦容白雲遮斷最高峯家山一角垂虹影

也擬推篷望九龍

觀察家無錫九龍山下

老鐵而今亦老夫散人蹤跡滿江湖旌旗倘拂三春柳

同補西泠送別圖

時聞請覲入都

附贈行詩

秦

瀛

小峴

吳門才子一簷同訪我西泠山色中記得段家橋下

過寒泉秋菊拜髯翁

竹兜斜日上茗蕘倘過餘杭訪洞霄天目徑山隨處

好一林殘葉響瀟瀟

新安江口雲容容前頭望見三姑峯三姑雲中出游

戲笑騎白鹿鞭癡龍

聞道長洲王鐵夫也將鼓棹到西湖何妨十日且須  
任同畫孤山踏雪圖

慧生手植桂乞詩二首

一簾香霧影濛濛移向靈山第一峯衣上露華猶未浣  
十年前到廣寒宮

虛向天街走馬來難攀紅杏倚雲栽分明指點秋光好  
招隱何須及第回

山居二首

久客厭塵網蕭然賦閒居垂虹水一曲水邊乃吾廬匪

獨遠城市落落成村墟往來謝冠蓋談笑逢樵漁門前  
有夏木屋後有春蔬卧聞叱黃犢我亦起荷鋤老農與  
老圃未必我不如

聚族無遠鄰與居忘壯老雞犬不相爭孩提互相抱歲  
時具尊酒懽然同醉飽言語少寒暄禮貌殊草草客去  
門不開客來徑不掃一村如一家莫謂酬酢少義農在  
目前我歸惜不早

亦廉六叔招同瑋堂二叔漢喬十弟酌酒半嶺  
僧房之讀書樓中信宿留題二首

一徑入寒竹衆山流濕雲礪聲林杪出龕火嶺頭分折

東鄰僧寄談詩我佛聞何曾散花兩松子落紛紛

樓閣虛無起房櫳次第排名山留此席高會自吾儕家

釀浮花盪行厨入笋佳三人能選勝不合太常齋庵王人携

酒榼來適以齋期但飽看飲啖而已

### 宿天柱菴

天近月銜山天山咫尺間燈昏神影動寺冷佛緣慳舍

利空存塔闍黎苦閉關林聲與溪響贈答幾時閒

小除前一日同亦廉六叔瑋堂二叔漢喬十弟

### 載酒吳山之麓聯句

一逕穿林麓山空淡夕陽尋幽携伴侶湘亭乘興挈壺

觴路滑苔黏屐亦廉溪平石作梁狂松吟萬壑瑋堂老

檜鬱千章席葉寒光淥漢喬侵衣暝色黃阿咸追杖履

湘亭小謝夢池塘燒笋餘霜味亦廉烹泉漱雪香浮杯

澆醜礪瑋堂扶杖笑郎當臘鼓催年急漢喬村巫賽社

忙驚心喧爆竹湘亭洗耳聽風篁轉憶金閨市亦廉倚

依玉映堂栖遲逢令節瑋堂漂泊白他鄉作賦題鸚鵡

漢喬開尊典嘯嘯頌椒雖聚首湘亭敬梓每迴腸高會

成前轍亦廉良游合勝常十年同一室瑋堂五字輒三

商擊鉢聲重疊漢喬淋鈴淚幾行關山呼斷雁湘亭風

雨失文鴛草草招南國亦廉纍纍弔北邙荒墳眠鹿豕

瑤堂平野散牛羊倦羽投林暗漢喬歸樵指路詳炊煙  
持西崦湘亭長嘯下平岡天籟非人竈亦廉詩狂更酒  
狂欲宜來日續瑤堂憂且暫時忘羣俊無拘束漢喬雄  
談劇慨據圖壚消夜漏珍重惜流光湘亭

立春前一日登北山聯句

家燕餘清興亦廉山游避俗緣酒尊開丙舍瑤堂詩筆  
紀丁年重着青油屐湘亭分題碧玉箋千家迎歲早漢  
喬一日占春先隔夜椒盤薦亦廉來朝綵勝懸竹林同  
把臂瑤堂花萼定隨肩深塢流泉冷湘亭高峰佈席偏  
雞聲丹嶂外漢喬樵響白雲邊石鐔攤書坐亦廉松根



掃葉眠衣沾空翠濕瑤堂觴乏小紅傳既置調羹鼎湘  
亭還張說餅筵味逾酥酪醴漢喬香雜蕙蘭荃霽雪林  
梢映亦廉寒濤屋角旋祇聞風滿壑瑤堂不見樹參天  
韻事堪圖畫湘亭清歌入箎絃劇談真袞袞漢喬起舞  
各仙仙獨我慙康樂亦廉多君盡惠連拚將薪代燭瑤  
堂莫問酒如泉去鳥衝殘燒湘亭歸人出遠煙異乎童  
冠詠樂此父兄賢漢喬

立春後五日同亦廉六叔瑋堂二叔漢喬十弟  
至宋村青山先坐拜畢携酒具慙飲竹間聯句  
得長律二章

朝來乾雀噪柴門亦廉隔巷招邀到宋村千載枌榆尋

舊社湘亭一家萍藻薦芳樽人言靈氣占科目瑋堂山

藹慈雲苴本根拜罷松楸歸路緩漢喬却攜酒具藉苔

痕亦廉

樵徑穿林絕處通湘亭千竿修竹影當空風搖瘦葉杯

浮蟻瑋堂雪壓長梢澗飲虹高會傳柑佳節近漢喬重

來燒笋幾人同眼前一抹青山色亦廉難得荆關點筆

工湘亭

### 哭亡友陳筠樵

玉河折柳訴相思豈料翻成訣別辭天或忌才貧亦可

地無知己去何之家山竟負千秋約人海空傳一卷詩  
爲有景差謂秋浦重握手倘能作達似生時

車盤嶺

下坂還登隴縈紆路幾盤茆蓬低似艇水碓遠疑灘獨  
樹穿雲古羣山釀雪寒鄉愁同轉轂不放寸腸寬

湖上畱別李石農觀察

太行西來筆一枝仙才鬼才能兼之青衫席帽兩髭緇  
十年不見爲監司我聞虞廷重才子史官首選臯陶詩  
公之才名在比部先以文章結

主知

兩司衡被

木榴山外界閩海頗聞終歲勞舟師公今備

兵未一載愛養士庶如愛兒靖盜之原卽在此况有綱  
紀相維持鯨鯢手斫鱣魚徙倒喝海水天吳馳公方擁  
旄周部曲翩然來此心驚疑鳴騶深巷忽相訪慰我落  
魄還吁噉春官七上再顛蹶爲郎苦乏相如貲連江畫  
角楚天遠挂帆那得東風吹此心已隨黃鶴去山人招  
我先題詩謂小峴  
廉訪湖雲卷雨飄涼颺碧桃花開酒滿卮  
春山淡若春波瀾水仙王廟蘇公祠鄴侯風流今在茲  
別公翻悵公來遲

讀小峴山人文集

就論文字亦天真妙筆何曾借古人我輩立言爭氣節

先生明道見經綸湖山放眼花如錦師友關心淚滿巾  
齊息園寶東 舍此不須求治術一編能令俗還醇  
舉兩先生

黃堯圃同年招同吳玉松太史張子和比部小  
飲讀未見書齋分韻得難字

檐溜初停逕未乾堂開綠野捲簾看人逢舊雨爭浮白  
天釀微雪護牡丹秘籍收藏同樹古齋中有古中年懷  
抱比春寒風前照眼三株秀也似娉嬭得見難諸郎各  
就質

石鐘山

巖崖尋仙蹟宵鐘不可撞山空聲挾水湖遠影涵江野

成雲生堞僧樓石作窓  
增吟和鏗鞳終日撼輕帆

### 琵琶亭

一曲青衫濕先生淚本多同心怨離別回首定風波添  
酒重張讌臨江且放歌從來淪落者才氣不消磨

### 黃梅縣晤徐聞齋刺史三首

囊底探新咏襟邊認舊題談心融水乳握手感雲泥壯  
志輕戎馬狂歌和鼓鼙書生具經濟餘子愧名齊

近訪坡公蹟來停江上船君才非百里此秩乃三遷話  
雨頻移榻臨風看着鞭殷勤培玉樹家學紹前賢

開府風流寂南樓付夕曛謂弁山尚書上書酬國士題石表

參軍

邑有鮑參軍墓  
闕舊立石表之

湖海依然合鄉關到此分自知飄

泊慣何以答青雲

### 道士泚

半壁俯江寬江清石骨寒波回如束帶山怒欲衝冠坐  
客憑窻怯篙師轉櫂難湘巫渺何處前望水漫漫

### 三江口泊舟

柳外殘星下驛樓驚鴻聲裡認汀洲一帆先向黃州卸  
兩賦虛傳赤壁游山鬼燒燈乘月落江豚吹浪拍天浮  
愁心翻借寒濤解直瀉潯陽九派流

### 雨中登大別山

片石鎖江關，滄江去不還。  
湘流爭入漢，雲氣莽吞山。  
白浪兼天湧，青尊就寺閒。  
晴川人散後，殘笛雨潸潸。

董牧堂孝廉

鍊金

以白陽山人畫乞題四首

濕雲一片雨初收，墨氣淋漓紙上浮。  
記得推篷山色曉，有人橫簾倚江樓。

白陽妙手本天真，雲海追摹品入神。  
不是雪蕉胡水部品目，豈知粉本出山人。

北苑風流未易攀，君家墨妙比荆關。  
流傳剩有襄陽派，不寫春山寫夏山。

回首春風夢有無，楚天南望楚山孤。  
何當添箇江帆影，



喚作平明送客圖

上元詞

珠籠綵綴千燭紅錦屏繡幙春光融銀花萬樹爛星月  
瑤釵四面圍香風熊蹯鹿尾金盤列帳外笙歌後堂設  
燈光搖動紅波璃隔窗窺見觥心凸銅壺水滴夜漏移  
喧聲雷碎人不知承平讌賞檀藥會人生行樂當及時  
酒闌默坐思歸客熒熒短檠照虛壁

妾薄命

夫君慣作客動輒千里行到家若旅食便有怨嗟聲行  
裝換冬衣時方布穀鳴知君游衍去決計滯歸程爲君

指流景言多不易聽晨朝索畫眉意懶託平生憐君自  
不悅何處測君情貞松但古意野卉多新英妾本是舊  
人舊愛合變更珠玉贈新好願君娛生平妾心終自愧  
妾命當自憎

草堂書意十首

拜石得佳友畫松見古心茫茫增百感何者爲知音  
立身功德言卓哉三不朽泛論古之人古人去我久  
一片空明境三生懽喜緣花香不在樹槩趣本無絃  
小鳥亦軒眉大魚不掉尾飛潛會有時其術取諸螳  
殘棋爭一著美酒賭千鍾氣盛不相下心休方有容

以羊肯易牛指鹿竟爲馬言者心之聲不分真與假  
裁詩如破竹釀酒必堆花詩心與酒面真味成一家  
高會宴羣仙鈞天張廣樂悠悠下界人好夢何時覺  
讀書觀大意一語概其餘上古結繩治何人先著書  
溪冷響漁父山空張獵網眼前得失輕何況非非想

雪後餘杭道中宵行

山徑鳥聲絕溪橋人跡稀雪深翁仲臥月落鬼燐飛五  
柳地名半程遠六花千頃肥欲沽仙姥醺何處問柴扉

登江天閣望焦山

一帆乘長風吹上江天閣入門不見山藏舟信有壑蒼

茫萬頃中此身得所託天地本大觀何必按圖索楚尾  
與吳頭指點非約畧到此不軒眉何處更插脚紛紛聲  
鼓聲早與寒潮落浮杯固虛無畱帶亦穿鑿言尋陶徵  
君檻外怒濤作我意欲凌雲誰能起痊鶴

梅花嶺

南都馬阮禍之蔽大張網錮掣公肘四鎮囂然議戰守  
破軍星趕羣豬走襄陽轟飲福祿酒蕪城鼓角生悲風  
中興歌舞同蒿蓬維公正氣持其終麻衣先哭孝陵土  
剩水殘山不能補遺笏空埋竟終古公死雖甘心太苦  
報公一語公勿傷不見雞鵝巷禪子禰

馬所居遣穢難尋

瓦礫場至今人拜梅花嶺  
黠說忠魂土亦香